



Inatsisartuni ilaasortaq, Bendt B. Kristiansen, Inuit Ataqaqitiit

Nuummi mittarfik pillugu § 37 naapertorlugu apeqqummut akissuteqaat

08-09-2017
Sags nr.: 2017 - 18081
Dok. nr. 23069374

Asasara Bendt B. Kristiansen,

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Nuummi mittarfik pillugu apeqqutinnut 2017-imi aggustip ulluisa 11-aneersunut qujanaq. Naalakkersuisoqarfiga akissuteqarnissamat ilassutissanik Kalaallit Airports A/S-imiit pissarsiniarsimavoq. Apeqqutit issuarneqarput, ataatigut akissuteqarfigineqarlutik.

Apeqqut 1:

1. Siunissami mittarfik, ingammik Nuummi, timmisartut maanna atorneqartunit allaanerusut atorlugit maanna tikikkuminassusianit tikikkuminarnerulissanersooq Naalakkersuisut nassuiarsinnaavaat?

Akissut:

Nuummi mittarfik 2.200 meterinut tallineqartussaag timmisartut allat, ullumikkornit amerlanerungaatsiartut, taakkunungalut timmisartut annerusut timmisartullu imarpiup illuatungaaneersut isorartuumut timmisartut ilanngullugit, missinnaalernerinik kinguneqartussaavoq. Mittarfik maanna atorneqartoq "non-precision approach" atorlugu minnissamat sumiissusersiutinik minnissamullu ikiorsiissutinik allanik atortoqarpoq, kiisalu mittarfik tallisaq "precision approach Category I"-imut atortulersugaasussaalluni. Tamatuma kingunerisaanik putsut pukkitsillugit aammalu ullumikkornit isikkivilunnerutillugu mittoqarsinnaassaaq. Tamanna mittarfinni piffissamik eqquisinnaanermut sunniuteqarluartussaavoq.

Apeqqut 2:

Mittarfissaq maanna inissisimaffimmit allaanerusumit inissinniarneqartoq, kiisalu sammivia allanngortinniarneqartoq paasineqarpoq. Sooq?

Akissut:

Nuummi mittarfissaq arlalinnik peqquteqartumik sangutinneqassaaq nikisinneqassallunilu. Mittarfippiami mittarfiup aammalu siunissami isumannaallisaanermut killeqarfissat silinnerusut Quassussuup sivingarninit sapinggisamik ungasinnerpaatinneqarnissaat pineqarpoq. Mittarfiup avannamat isuani aammalu Saviminikunik Eqqaaveqarfimmi mikkiartornermut qullernut napparutinik portusuunik toqqaveqarnissaat pisariaqassanngilaq. Mittarfimmit ungasinnerusumut qiviaraanni, mikkiartornermi tinginermilu ilaatigut Sermitsiap Ukkusissallu sunniutigisartagaat annikillisinneqarpoq.

Apeqqut 3:

Mikkiartortarfiit Ukkusissamut Sermitsiamullu atatillugu qanoq eqqarsaatersorfigineqarpat. Tassunga ilanngullugit silaannaap aalarulunneranut apeqqut?

Akissut:

Angallannermut, Sanaartornermut Ineqarnermullu Aqutsisoqarfiup 21. august 2017-imi Nuummi mittarfissaq pillugu suliap ilaanut akuersissut Kalaallit Airports A/S-imut tunniuppa. Suliamut akuersissut naatsorsuutigineqartut arlalinnik piumasaaqateqarfiusut, taakkunungalu ilaatigut silaannaap aalarulunneranut aarlerisaarinnermut atortunik, kangerluup inissisimaffianut atuuttumik ikkussisoqarnissaa ilaatinneqarpoq.

**Apeqqu 4:
Siunissami toqqarluinnarluni tikikiartortarnermut atatillugu qanoq eqqarsaatersortoqarpa?**

Akissut:

Toqqarluinnarluni tikikiartortarneq (RNP approach-imik taaneqartoq) Nuup eqqaani ajornanngitsoq paasineqarpat, mikkiartornermut aqquutit sangujoraarsinnaalissapput, taamaalilunilu najukkami silap pissusai, tassungalu anori ilanngullugu, allaavigineqarsinnaalissapput. Kalaallit Airports A/S-ip maannárpiaq toqqarluinnarluni tikikiartortarnermik atuilluni piffissamik eqquisarnerup pitsaanerulernissaanut periarfissat pillugit sullissisut timmisartuliortartullu oqaloqatigai.

**Apeqqu 5:
Siunissami timmisartut qanoq issappat, tassani ilaatigut propit turbopropillu jetinik mittarfinni nutaani mittarfissanilu atorineqarnissaattut eqqarsaatigisat ilanngullugit?**

Akissut:

Nuummi Ilulissanilu mittarfiit timmisartunik aalajangersimasunik (timmisartut angissusiinik), taakkunungalu timmisartut sukkasuuliat kategori D tikillugu angissusillit (soorlu Airbus A330) ilanngullugit, tiguisinnaanngorlugit sanaartorneqassapput upalungaarsimanermilu atortulersorneqassallutik.

**Apeqqu 6:
Killeqanngitsumik nalingiimmillu niuernerup qulakkeernissaatut atatillugu kiisalu atortunik timmisartullu eqqussiviinik piginnittuuneq aqutigalugu unammillernissamut Naalackersuisut qanoq eqqarsaatersuuteqarpat?**

Akissut:

Sullissisut mittarfinnut timmisartuuserrusussinnaasut akornanni unammilleqatigiinnerup annertusineqarnissaa Naalackersuisut mittarfinnut nutaanut politikkerivaat. Mittarfiit Kalaallit Airports A/S-imit sanaartorneqartut timmisartunit sullissisunillu assigiinngitsorpasuaranit atorineqarsinnaasunngorlugit sanaartorneqarnissaat peqqutaarpiarpoq. Mittarfinnut allanut, suli Namminersorlutik Oqartussanit pigineqartunut tunngatillugu, Namminersorlutik Oqartussat assersuutigalugu Narsarsuarmi DMI-p (Danmarks Meteorologiske Institut) hangaria pisiareqqammerpaat. Taamatut iliorneq mittarfinnut

atortulersuutit niuerutigineqarnerisa qilersorsimanngitsumik assigiimmillu atorneqarsinnaalernissaannik qulakkeerisinnaanerup annertusineqarnissaa siunertarineqarpiarpoq.

Apeqqut 7:

Open Skies sumut killippa? Open Skies iluaqutaasinnaanera eqqarsaatersuutigineqarpa sooq taanna allaluunniit?

Akissut:

Kalaallit Nunaanni silaannakkut angallannermut attaveqaatinik allannguinermi Naalakkersuisut takornariaqarnerup annertusinissaanut takorluugaqarnerat pingaarnertut tunngavigineqarpoq. Takornariaqarnerup annertusitineqarnissaanut sullissisut amerlanerusut Kalaallit Nunaanni mittarfinnut timmisartuussinissamut kajumissaarneqartarnerisa annertusineqarnissaa periarfissanut ilaavoq. Open Skies-imut isumaqatigiissutit suliniutip taassuma siuarsarneqarnissaanut toqqammaviusinnaapput. Maannarpiaq sullissisut avataaneersut Kalaallit Nunaanni timmisartuussinissamut qinnuteqartussaapput, tamatumunngalu angallannermut politikikkut akuersissutigineqarnissaa uanga Naalakkersuisoqarfinit suliarineqartarpoq, kiisalu sullissinissamut akuersissutit Angallannermut, Sanaartornermut Ineqarnermullu Aqutsisoqarfimmit suliarineqartarluni. Open Skies-it sullissisunut taakkununga allaffissornikkut aporfissaasinnaasut oqinnerulersittussaavaat.

Kisiannili nunap iluani angallannermut inuiaqatigiillu aningaasaqarnerannut tamarmiusunut sunniutissaat misissoqqissaarneqartussaapput. Naalakkersuisut maannarpiaq Open Skies-inut isumaqatigiissuteqartarnerni siunnerfissat sukumiisumik misissuiffigaat.

Neriuppunga qulaani allaqqasumi apeqqutitit akineqartut.

Inussiarnersumik inuulluaqqusillunga



Erik Jensen